



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8




Trump-i temeshi tesem
mezüngmeshi: Kamala Harris



Taoba mapang Ivory Coast
defender Bamba süogo

VOL. XXI ISSUE NO. 320 (ADOK 320) DIMAPUR TENTONÜ (MONDAY) RONGJUI (SEPTEMBER) 02, 2024 ₹ 5.00

Deobarnep Noklak jila nung menoknok anak



Noklak, Nagaland
2024-09-01 03:36:39 (IST)
Lat: 26.24, Long: 95.03
Depth: 10km

Felt Responses
More Info

3.0

Guwahati, September 1, 2024

(Agencies): Deobarnep Nagaland aser Mizoram nung aser ano nikongdang Assam nung menoknok anak.

September 1, 2024 anepdang Nagaland aser Mizoram nung 3 magnitude nung menoknok anak.

Nagaland kübok Noklak town nung 3.0 magnitude menoknok ka anak ta National Centre for Seismology (NCS)-i metetdaksüogo.

Iba menoknok ya tanep 3:36 ako meta Noklak area nung ali telunglen kilometer 10 irr anak ya NCS-i ashi.

Noklak nung menoknok anakdang nisung teimbaka yipten nung mejanga orr liasü aser taoksa nung nisung aika kimai aluba osang angazüker. Ajisüaka nisung yiruyibongba mesüra teraksa ajuruba osangbo mali.

Mizoram nunga tanep 10:31 ako nung Kolasib district nung menoknok anak. Menoknokji ali telunglen kilometer 30 shi irr ano saka menoknok ajanga nisung yiruyibongba mesüra teraksa bentsür aruba osang kecha mali.

Maneni, taonung 7.12 ako meta Assam kübok Morigaon

district nunga menoknok ka anak. Menoknokji ali telunglen kilometer 23 shi irr anak.

Morigaon nung tiyongtsü ser anakba menoknokji Guwahati nunga kongshi aser iba ajanga nisungtem taoksa nung kanga petsaprongtep saka nisung yiruba mesüra kiojen raksaba osangbo kecha mali.

Northeastern state tem ya 'high seismic zone' nung lir aser mapang shia menoknok anoker.

Assam putiotsü nung menoknok 1897 aser 1950 nung menoknok tesashi anaben anak.

1897 menoknok ya June 12 nü atalok aser Richter scale nung 8.2-8.3 magnitude ta asadangteta liasü. Iba menoknok nung nisung 1,542 asü aser teraksa jenti bentsür arua liasü.

1950 menoknok dang Assam earthquake ta ajar aser iba ya August 15 nü atalok. Menoknokji Richter scale nung 8.7 magnitude liasü aser Mishmi Hills tiyongtsü ser anak.

Aonung 7:39 ako nung menoknok anakdang Assam aser Tibet nung teraksa jenti bentsür arua liasü. Iba menoknok nung nisung 4,800 shi taküm sama.

Dimapur hotel ka nung tetsür ka sür lia angu

Dimapur, September 1, 2024 (TYO): Honibar aonung Dimapur nung Burma camp nung aliba hotel Falcon takdang ka nung arishi küm 26 tain aiür ka sür lia angu.

La ya August 8 nungi iba hotel nung mongyonga aru. Yakünü nungi la takdang nungi maluba agi hotel nung inyakertemi yashi nikongdang 4:00 ako meta kishi nung akoshia la jadang saka telangzüba kecha maliasü.

Iba jagi hotel ketdangsürtemi Dimapur Police nem osang sangoktsü aser Women Police arua kishi kakpoker takdang

telungi aidang la yipden nung sür lia angu.

Dimapur police-i la tasü mang District Hospital Dimapur-i bener ao aser idak nungjagi tanü lar kinunger nem mang agütsüogo.

Tasüla ya Peren district nungi liasü aser lar kinungertemi post mortem asütsü memulung. Tebu tanuboi ashiba agi parnoki shinga dak-a temulung malemba mali aser la tesüiba mapang kangshiba tashidak ajanga asü südi ta ashi.

Ajisüaka Dimapur Police-i iba tatalokba atema suo moto FIR ka benokogo aser maneni bushisingdang südar.

NLTP Act atema o atsütepba ajanga telemsa adokogo: NPCC

Dimapur, September 1, 2024 (TYO): Nagaland state sorkari The Nagaland Liquor Total Prohibition (NLTP) Act, 1989 meyipa repringshitsü lemtetba aser iba atema o atsütep zenzükba ajanga Naga loktiliba nung telemsa ana adokogo ta Nagaland Pradesh Congress Committee (NPCC)-i ashi.

Nagaland nung taoba Congress

sorkar mapang NLTP Act 1989 ya 1989 küm yanglu aser 1990 nungi mapa tenzüka liasü. Iba mapang public-i kanga aginüba nung ajemdaker Act yanglu aser tanü tashi NPCC-i iba lemtet nung akangakanga noktaka lir ta Communications Department-i sangdong ka nung ashi.

Nagaland sorkari Act meyipa repringshinüba ya magizüker

aser parnoki lemtet agiba meyipa agitsü ayongzüker. Yamaji mesüra nisung ajak den asüngdangtepa aser haihaura khatepba sülen ang lemtet ka agitsüla ta NPCC-isa ashi.

Nagaland nung alirtemi tanü tensa asadanga repringtsü aser jashitep madoki iba tebilemstü atema inyaksü mepishir, ta NPCC-isa metetdaksüogo.

'Miya Muslim' nunger metsüba ango machitsüla: Assam CM

Guwahati, September 1, 2024 (Agencies): Assam Chief Minister Himanta Biswa Sarma-i urea fertilizers amshia metsüba ango machitsü ayongzüker.

"Miya Muslim nungeri urea fertilizer amshia ango metsür aser iba ajanga temesen tashidak adoktsür anungji asenoki ibala ango machitsüla. Assamese nunger Upper Assam nung ango metsütsüla" ta CM Sarma-i ashi.

Nagaon nung ango shishilembar kari parnok tesem nung apuba ango nung urea aika keta alitsü akok aser iba ajanga tezüngjang tashidaktem adokdaksütsü akok ta ashiba sülen CM Sarma-i iba osang metetdaksü.

Nagaon nung ango

shishilembar lower Assam leni ango meyoktsü noktanga metetdaksü aser temang nung timtem magütsütsüsa metsüba ango ang nüngdaker ta metetdaksüogo.

Upper Assam nungi Muslim nunger meindokba atema Central Assam nung Muslim nunger ango shishilembar Upper Assam leni ano yokba anen. Iba jagi CM Sarma-i Miya Muslim nunger shishilembar rongsenketzüng mokdangba ya lendong tulu ka lir ta ashi.

Paisa "Miya Bihu" amongba ya Assamese sobaliba mezüngmeshiba inyakyim ka lir ta ashi.

"Miya Bihu" ya Miya Muslim nungeri tenzüka Bihu benjung amongba lir. Bihu ya Assamese

New Year aser alu arohba mongpu benjung ka lir.

"Tanü Miya Bihu ta ser benjung tasen ka amongba ajanga Assamese nunger temulung yirutsür aser asen sobaliba nung kongshiba ya magizüksüla" ta CM Sarma-i ashi.

Nagaon district nung tanur tetsür ka dak tebur telok kati tashiyim agi shi nung medemba sülen telok kari 'miya' nunger ajaki district toktsür aotsü takhangba agüja liasü.

Chief Minister Sarma-i taoba Mongulbarnü assembly nung Miya Muslim nunger nem Assam agidaksütsü memulung ta ashi.

Miya Muslim ya Bangladesh nungi aruba Muslim nunger dang ajar.

Imphal West district nung tetsür ka khaset; 4 yiru

Imphal, September 1, 2024 (Agencies): Manipur nung Imphal West district kübok Koutruk anasa khatepdang tetsür ka khaset aser lar jala densema nisung pezü yirua anepaludar.

Tanü nikongdang 2.35 ako meta Kangpokpi kübok Nakhujang yimtsüng nung khatep tenzüker aser Imphal West kübok Kadangband leni khatepyonga aru ta osang angazüker.

Kadangband nung alirtemi ashiba agi drone kati ki ka nung "bomb" tsüka pokdaksü aser parnokisa iba indang noksatem sayuogo.

Deobar nikongdang 2:00 ako meta village volunteers malidang telungpur ta temulung melemi bilemertemi injang khaloktsü ta Koutruk Village Gram Panchayat chairman-i ashi.

Iba lendong nung arishi küm 33 tain Surbala Devi khaset. La dak injang khaloktsüba sülen Regional Institute of Medical Sciences (RIMS) Hospital,

Imphal-i anir ao saka la süadoker liasü.

Külen Surbala'er arishi küm 13 tain jala Rojija yirur RIMS nung anepaludar ta ketdangsürtemi ashi.

Iba lendong nung yirua alirtem rongnung arishi küm 30 tain police officer N Robert densema lir. Pa ya Awang Khunou Maning Leikai nung alir.

Külen, Inao Takhellambam (26) aser Thadoi Heigrjam (19) na Raj Medicity hospital nung anioka anepaludar.

Iba tatalokba sülen ketdangsürtemi Imphal West district nung curfew benokogo aser Manipur sorkaria aitsüba metetdaksüogo. Iba mapa inyakertem ozüing tesashitiba agi merenshitsü ta sorkari ashi.

"Kuki telungpurtem ta temulung melemi bilemertemi high-tech drones amshia RPGs aika yok. Rara nung drone bombs mashir, saka tawa sepaitem aser civilian amaktsü

atema drones amshia bomb pokdaksüba ajanga tensa tamajungba akümtsü" ta Manipur Police-i metetdaksü.

"Kuki telungpurtemi drones, bombs aser prangpong amshia Koutruk nunger amakba osang sorkari angashiogo" ta Manipur home ministry-ia ashi.

"State sorkari tensa süngjemtsü aser yimjung bener arutsü atema meranga inyakba mapang ka nung tai maketba yimdaklirtem tsübudakja amakba ya state sorkari süoki ia bilemer" ta home ministry-isa ashi.

Imphal West kübok Koutruk yimtsüng nung tensa azüoktsü aser amakertem merenshitsü atema mapa tenzükerogo ta Manipur sorkaria ashi.

Kuki kiralongrartemi tetsürla khaset ta Meitei nungeri ashir saka külen Kuki nungeri ashiba agi Meitei nungeri mezüng Kangpokpi nung Kuki yimtsüngtem dak injang khaloktsü.

Meghalaya nung sen auyartem Nagaland Police-i apu

Dimapur, September 1, 2024 (TYO): August 25, 2024 nü Meghalaya nung Umran Dairy nung aliba petrol pump ka nung Rs 4 lakh auya bener ajenertem Dimapur Police-i puogo.

Nisung pezüi sen auyaba sülen Bolero gari (Nagaland registered) ka nung jena ao aser

Deobarnü Dimapur Police-i tesem balala nungi tai tongloka alir nisung 3 apu.

Parnoki amshiba Bolero gari (NL 07 CB 0156) ngutetogo aser par asem den gariji Meghalaya Police ket nung agütsüogo ta DGP Nagaland Rupin Sharma-i metetdaksü.

Par asem ya arishi küm 33 tain Bashen Lam (Moa), Bokavi Zhimomi (25) aser Rokongulie Kebu (17-18) ta jangjaogo.

Bashen ya Burma Camp, Urban Housing block 2, Bokavi ya Veterinary colony, Burma Camp aser Rokongulie ya Rail Bazaar, Dimapur nung telidak lir.

GHSS Diphupar 'A' kaketshirtem workshop ka nung shilem agi



Dimapur, Rongjui/September 01 (TYO): Government Higher Secondary School Diphupar 'A' nungi kaketshir temi Sustainable Lifestyle Workshop on Bamboo Crafts nung shilem agi, koba Nagaland Bamboo Resources Centre, Chümoukedima nung ayongzüka liasü.

Iba workshop ya State Nodal Agency, Nagaland Pollution Control Board

(NPCB) kübok Environment Education Programme ajanga ayongzüka liasü.

Iba sentong tenzüka Nagaland Pollution Control Board indang Programme Officer-i jembidang eco-friendly products tem amshitsü aser plastic amshiba ajemtsü indang kaketshir nem angatetdakja liasü.

Sentong nung kaketshir dang süngkum agi yangluba

oset asem, bamboo spoons, bamboo brooms aser bamboo pen stands tem yangluba yimya sayua liasü.

Iba workshop tembangba sülen kaketshir shia nem sentong nung shilem agiba kulizüing kaket ka-ka agüja liasü.

Iba Workshop nungya Government Higher Secondary School Diphupar 'A' nung Class 10 nungi kaketshir 59 dena liasü.

Guwahati nung tüzümeetsüing agi maneni tim atemer

Guwahati, Rongjui/September 01 (Agencies): September 1 anepdang Guwahati tesem kar nung tüzüinglu kanga sashia aruba ajanga yimti nung ajungbena tüzümeetsüing adoka liasü.

Tüzüinglu tanen makai aruba ajanga yimti tesem kar tzü agi mubanga nüburtem tsübotepa liasü.

Tang tüzümeetsüing yimzüka moi atsüingdena aliba tesemji Chandmari, Beltola, Hatigaon, Six-mile, Noonmati aser Kahilipara tesemtem alitsü.

Tüzümeetsüing yagi traffic nunga timtem agütsütsü inlar, kechiaser tüzüinglu maneni aruba ajanga lenmang nung gari mesenzütetsü.

Tensa mejungi aliba mapang India Meteorological Department (IMD) aser Guwahati's Regional Meteorological Centre ajanga Dispur aser Sonapur tesemtem nunga tüzüinglu kanga sashia arutsü ta tekumdangtsü metetdaksüogo.

Tüzüinglu kanga sashia aruba ajanga June 5 nüa iba yimti tesem balala nung tüzümeetsüing adoka nüburtem timtem kanga ajurua liasü.

Tüzüinglu kanga sashia aruba ajanga mapang shia tzü yimzüka moteti Guwahati nung nüburtem timtem ajuruba tesem ishika lir aser item rongnung Chandmari, Hatigaon, Sijubari aser Six-mile tesemtem ya lir.

Assam CM kinungtsüi Majuli nung ali aliba mechi mangatettep adok



Assam Chief Minister Himanta Biswa Sarma aser pa kinungtsü Riniki Bhuyan Sharma noksa nung angur.

Guwahati, Rongjui/September 01 (Agencies): Assam Chief Minister Himanta Biswa Sarma kinungtsü Riniki Bhuyan Sharma-i Majuli nung ali bigha 18 aliba mechi mangatettep ka adoka lir.

Assam Assembly nung Assam Land and Revenue Regulation (Second Amendment) Bill, 2024 agizüksü ita aika lia Riniki Bhuyan sharma-i iba ali ya alia liasü.

Tang agizüka aliba Act yagi non-locals temi küm 250 dak tema "iconic structures" temeket kilometre pongu tsüingta ali alitsü memelar.

Iba ozüing ya Assam indang senmang aser sobaliba wazüka ayutsü nükjidong nung yanglu, koba ajanga teshimtet tesem kar nung "original inhabitants" (generations asem tashi alirtem) dang ali ayoktsü memelar.

Ajisüaka Assam sorkari Majuli ya iba Act küboki November 2024 tashi maitdaksütsü lemte.

Chief Minister Sarma-i pa kinungtsü nem ali alidaksütsü mechi asaa Majuli ya iba Act küboki maitdaksü, ta Rajior Dal lenir Bhasko De Saikia-i tai tongloksü.

Saikia-i ashiba agi, Ekaa Estates LLP (Riniki Bhuyan Sharma aser tena jabaso Nandil

Biswa Sarma na meyong) ajanga Sharma-i Majuli nung ali bigha 19 (18 bighas, 4 katha, aser 14 lessa) shi ali.

Ekaa Estates LLP ya Shillong-registered construction company ka lir aser December 25, 2022 nung amenok ta public records ajanga ashir.

Bill ya magizükdang Riniki Bhuyan Sharma-i anaben nung ali aliba maparen ya renem.

Mezüingbuba ya May 18, 2022 nung ali asr tanabuba ya June 1, 2023 nung ali. Mezüing alidang ali ya Sunil Neog, Bhabananda Neog, Robin Neog, Mahendra Neog, Minakshi Neog, Praful Neog, Saroj Neog, Dilip Neog, aser Sabita Neog nunger ket nungi alizüka liasü.

Tanaben June 1, 2023 nü alidang kasa yimtsüing nung alir Narayan Pachani ket nungi bigha ka aser lechas 16 alizükba dena lir.

Himanta Biswa Sarma Assam chief minister akumba sülen par kibongi ali rongsen jenti bendener, ta Rajior Dal-i aitsür.

Riniki Bhuyan Sharma-i pa kinungbo chief minister akumba sülen ali bigha 125 aliogo, ta Saikia-i ashia.

Pai ali aliba indang bushisüingdangtsü akhang aser sorkari par kibong kumzüka ayur ta aitsü.

Manipur nung temesepba mozü agi nisung 81 lakum samaogo: SASO

Imphal, Rongjui/September 01 (Agencies): Manipur nung tesüiba küm 20 tsüingta temesepba mozü tali amshir tetsür 21 densema nisung 81 lakum samaogo, ta Social Awareness Service Organisation (SASO) indang report ka ajanga ashir.

Iba non-profit organisation ya state nung temesepba mozü amshiba samadaksütsü asoshi kanga meranga inyaker aser International Overdose Awareness Day bilemteta sentong ka agidang iba tasadangba osang ya agüja liasü.

2004 nungi 2024 küm March ita tsüingta Manipur nung

overdose cases 1737 lir, ta SASO indang general secretary Sashikumar-i ashia.

Nisung 1656 lakum kumzük aser tanüingba nisung 81 ya iba temesepba mozü nem kokdakja lakum sama. Asürtem ya arishi küm 17 nungi 65 tsüingta lir.

Küm shia overdose cases tali akumba tebilemtsü indang iba report nung shia liasü. 2005 küm iba ama tatalokba pongu dang liasü saka iba sülen tanem-tanemi timba akum, ta SASO ajanga ashia.

Manipur nung aser talisa arütsülen temesepba mozü amshiba ya state sorkar asoshi tebilemtsü tulu lir.

Manipur nung nisung 1.5

lakum dak tema temesepba mozü achi-ajemba agi timtemtar, ta Chief Minister N Biden Singia taoba mapang shia liasü.

Manipur nung temesepba mozü achi-ajemba tebilemtsü ya akhi mapang nungi lir, aser 1980s nungi iba tebilemtsü tali arur.

Manipur nung arishi küm 10-75 tsüingta nütsüing yongsük shilem pezü shi opioid amshiba agi kongshia India nung 'fifth-highest prevalence rate' jenjang nung lir.

Manipur nung temesepba mozü indang tebilemtsü koktettsü atema mera tajung agitsü kanga nüngdaka aliba data ajanga sayur.

Meghalaya nung migrant workers tesashiba alentsü



Shillong, Rongjui/August 01 (Agencies): Tenüing junga mezüluoki aliba migrant workers atema tawa KSU-i anir longkak aitba sülen Meghalaya sorkari ozüing alema state-i aiter azüoktsü aser migrant labourer tem kumzüka ayutsü asoshi mozüing tali tesashiba yangluogo.

Tang agizüka aliba Meghalaya Identification, Registration (Safety & Security) of Migrant Workers (Amendment) Bill, 2024

nungya tongtipang teinyaktsü asem lir - permit agütsüba nung mera tesashiba agitsü, ketdangsurtemi achayangba nung tashi itshitsü aser mapa agütsür tem aibelenba atema temerenshi tesashiba alitsü.

Ozüing tasenba kübok aibelener dang senchi sen 1 lakh tashi achitsü aser maneni aibelenra tepuokdak ayutsü.

Iba Act yagi migrant workers ajunga jangjateta tenüing züluoktsü aser parnok kumzüka ayutsü aser ozüing alema nungboka aitba

tebilemtsü bentettsü asoshi system ka amenoktsü.

Mapa inyadaksür shirnoki migrant workers tenüing mezüluoker, parnok dang senchi sen 5,000 nungi lakh ka tashi achitsü (taoba mapang senchi sen 500 liasü). Maneni aibelener tem ita asem tashi tepuokdak ayutsü.

Iba Act mapa kuma inyaktsü atema sorkari "Inspectors" aser "Registering Officers" shimogo. Iba Act tali jangjashia aser tashi itshia tajungtiba nung amshitsü mechi amendment ya yanglua liasü.

Illegal immigration tetsübo nung Meghalaya nung migrant workers tem dak züka merenshiba tali akumba mapang iba Act ya yanglushir.

Durand Cup 2024 asayatsü lia Delhi nungi technician ka anir aruba dak züka merenshiba densema tawa iba ama lendong balala ajangshia arur.



September 01, 2024 nü New Delhi nung Congress lenir, Abhishek Manu Singhvi leniba nung party indang legal department senden amendang tangokba noksa nung angur.

September ita nunga North India nung tzunglu kanga arutsü: IMD

New Delhi, September 01 (Agencies): August ita nung ama September ita nunga India nung tzunglu 'normal' dang nungi tali arutsüa akok, ta Amongnü IMD-i metetdaksü.

Uttarakhand aser Rajasthan ama state tem nung tzunglu kanga aruba ajanga tzumetsung aser anentsüh lendong ataloktsüa akok.

September ita nunga linük tesem teimbaka nung tzunglu 'normal' dang nungi tali arutsü, talisa Uttarakhand, Rajasthan, Himachal Pradesh aser Punjab nung tzunglu sashia aruba ajanga tzumetsung aser anentsüh lendong ataloktsüa akok, ta parnoki metetdaksü.

August ita nung India nung tzunglu 'normal' dang nungi shilem 16 agi tali arua liasü, ajisüaka temperature bo ajema maküm.

August ita nung northwest India nung tzunglu 'normal' dang nungi shilem 32 tali arua liasü aser ibaji 2001 küm sülenbo August itatem nung tzunglu teimtiba aruba tanabuba jenjang lir.

September ita nung tzunglu 'normal' dang nungi tali aruaka north Bihar, northeast Uttar Pradesh, northeast India tesem kar, northwest India tesem kar aser south India tesem kar nungbo tzunglu 'normal' dang nungi tajemba arutsüa akok, ta IMD-i metetdaksü.

India ya tourist spot Top 10 nung zungoktsü: Gajendra Singh

New Delhi, Rongjui/September 01 (Agencies): Taruba küm 5 tsungda India ya alima nung tourist spot temaba jenjang 10 rongnung zungoktsü aser tourism sector ajanga India nung rongsenkettzung shilem 7.9 aliba nungi shilem 10 akümsü, ta Union tourism & culture minister, Gajendra Singh Shekhawat-i metetdaksü.

Tourism industry-i public private partnership (PPP) model nung ajemdaker nijatem dang nungi investments bushir, ta paisa metetdaksü.

Union minister-isa Buddhist tourism, domestic tourism aser public-private partnership models metetdaksüdang pai, "PPP models ya tourism tesem tasen yanglutsü aser tourism ajungkettsüsü atema lir," ta metetdaksü.

Coronavirus wara sülen India-i alima nung raliwalirtem nem maongka ajak agütsür aser internet nung India nung tourism tesemtem bushiba shilem 48 agi teimba kümogo, ta pai metetdaksü.

"Nisungtemi India

reprangdangner aser India angatetner. Taruba kümtem nung linük tourism aser international tourism jenjang kanga ajungkettsü aser iba nungji linük tourism tongti asütsü. Bendanglen nungi India semdangertem shilem 65-i India kübok state tenet dang semdangner," ta Union Minister-isa metetdaksü.

State ajaki tourism sector ajungkettsüsü meranger aser ibaji ajanga linük rongsenkettzung ainba nung shilem agir, ta paisa metetdaksü.



Anogo ishika tejaklen Mumbai nung Chatrapati Shivaji Maharaj indang kürakyanglu chirepba anema September 1 nü Mumbai nung Maha Vikas Aghadi lenirtemi Rajkot Fort nung longkak aitdang tangokba noksa nung angur.

Vadodara district nung nisung aliba tesemtem nung tzurang 24 puogo

Vadodara, September 01 (Agencies): August 27 nungi August 30 tashi Gujarat tesem balala nung tzunglu maneni aruba mapang Vadodara district nungbo nisung aliba tesemem nung tzurang 24 shi puogo, ta Amongnü forest department nungi ketdangser kati metetdaksü.

Tzunglu maneni aruba ajanga Vishwamitri ayong nung tzü kanga mobanga yima Vadodara yimti tesem aika nung tzü metsung.

Iba ayong nung tzurang 440 shi lir; Ajwa dam nungi tzü chiokba ajanga nisung aliba tesem aika nung tzü metsung aser tzuranga aika yimti tesem balalai oa liasü, ta Vadodara Range Forest Officer, Karansinh Rajput-i metetdaksü.

"Tzurang 24 dak alia onoki per, hano aser jepju densema tanga shiruru 75-a kumzükogo. Vishwamitri ayong anasa nisung aliba tesem aika lir," ta pai metetdaksü.

"Tzurang tilatibaji süklep ana shi liasü aser tulutibaji süklep 14 talang liasü. Brihostibarnü EME Circle nungia tzurang süklep 11 talang ana apu," ta Rajput-i metetdaksü.

Ajisüaka anogo asem tsungda tzurangi nisung nem timtem agütsüba tatalokba mali, ta pai ashi.

"Tzurangi meimchir mamaker. Ayongtem nung parnoki ango aser tanga shiruru tasü achir. Parnoki azü, ak mesüra tanga shiruru tila tepseta achitsüa akok," ta paisa metetdaksü.

Vishwamitri ayong nung tzü level ajema kümdar, anungji tzurang den tanga shirurudemji tanaben chioktsü, ta paisa shisem.

Ano külen tanga osang ka nung, Gujarat nung tzunglu maneni aruba aser tzumetsung ajanga teraksatsüba asadangtsü asoshi ministry of home affairs (MHA)-i Inter-Ministerial Central Team (IMCT) ka tentetogo.

Amongnü MEA sangdong ka ajanga, National Institute of Disaster Management (NIDM) executive director leniba nung Inter-Ministerial Central Team jagi Gujarat kübok tzumetsung agi kongshiba district tem semdanga teraksatsüba asadangtsü, ta metetdaksü.

Gujarat nung August 27 nungi tenzuka August 30 tashi tzunglu maneni aruba a j a n g a l e n d o n g balala nung nisung 47 tashi süogo.

CPI(M)-i Jammu & Kashmir election atema party manifesto saya

Srinagar, September 01 (Agencies): Amongnü CPI(M) lenir, M.Y. Tarigami-i Jammu & Kashmir assembly election atema party manifesto sayaogo, talisa parnoki lisopurtem ali temeden atema inyaksü, ta nangzükogo.

Party manifesto nung Jammu & Kashmir-i tanaben state jenjang angütsü atema inyaksü nangzuka lir. 2019 küm August 5 nü Centre sorkari linük temzung kübok Arrla 370 aser Arrla agiena liasü. Item arrla ajanga J&K nung nem temeja maongka agüja liasü.

CPI(M) manifesto ajangsa yimtenren tsütsü tepuokdak alirtem ajak chioktsü aser Jammu & Kashmir nung shinga maputsü takhangba agüja lir. Parnokisa Public Safety Act den ozung tesashia ajak agütsü aser tanaben state jenjang agüjang ta akhanger.

Party-i, Jammu & Kashmir nung lisopurtem ali temeden lir aser bendanglen nungi arurtem nem J&K nung ali temeden magütsüsüla, ta metetdaksü.

Manifesto nungsa media anema tenokdangba ajak agütsü, mapa manguba tebilemetsü atema inyaksü, ta paisa shisem.

registered trade unions amokmerenba anentsü aser Mahatma Gandhi National Rural Employment Guarantee Act (MGNREGA) kübok anogo ka taa sen 600 akümsü akhanger.

Manifesto ajangasa tawa sorkari mapa inyaker aika anentsüba atema sorkar aitsüba den külemi matamabensartem nem pension 6,000 agütsüsü aser GDP nungi shilem 6 bo shisaliok nung indoktsü takhangba agüja lir.

"Fraud on Constitution, Kashmir Betrayed," ta ajaba sangdong ajanga CPI(M)-i Modi sorkari linük temzung, democracy, federalism aser secularism anema inyakba aitsü.

Manifesto sayaba sülen Tarigami-i nüburtem dang kanga shisadanga vote agütsüba ajanga lenirtem shimtsü ayongzük.

Kulgam nung lokti senden ka nung jembidang pai, "Iba election ya Jammu & Kashmir nung alirtem atema khuret ka dang masü saka tongtiban onüktem atema inyaksü asoshi maongka lir," ta metetdaksü. Tebilemetsü onük balala bentettsü atema secular party tem longjemtsü nüngdak, ta paisa shisem.



September 1, 2024 nü Srinagar nung Peoples Democratic Party (PDP) Tir, Mehbooba Mufti-i Separatist lenir Saleem Gilani (abelen) party nung agizükdang tangokba noksa nung angur.

बैंक ऑफ महाराष्ट्र Bank of Maharashtra महात्मा जवाहर लाल नेहरू एक परिवार एक बैंक		GUWAHATI ZONAL OFFICE 1st Floor, Dwarka Center, Lachit Nagar Sani Ram Bora Path, Bora Service, Ulubari, GS Road, Guwahati -781007 e-mail : zmguwahati@mahabank.co.in, dzmguwahati@mahabank.co.in		POSSESSION NOTICE
Securitization and Reconstruction of Financial Asset and Enforcement of Security Interest Act - 2002 aser Security Interest (Enforcement) Rules, 2002 indang Sec. 13(12) aser rule 8 nung ajemdaker Bank of Maharashtra nung Authorized Officer-i column no. 3 nung aliba anogo nung Demand Notice ka ajanga column no. 1 nung aliba sen apurtem/Guarantors dang column no. 3 nung shia aliba senji iba notice agütsüba anogo nungi anogo 60 tsungda agüjang ta metetdaksa liasü. Sen apurtem/Guarantors-i senji magütsüet nungji sen apurtem/guarantors aser public dang tsunglanglen sign süa aliri iba Act nung Section 13 (4) aser Rules nung aliba rule 8 nung agüja aliba tashi amshia 30-08-2024 anogo nung kiojen agiadokogo.				
Sen apurtem/Company/Guarantors aser Public dang item kiojen dak sendakba nung kecha inyaksangshi masütsü metetdaksür, mesüra Bank of Maharashtra nem metetdaksa aliba sen denji külemi sen tetemlok agütsüsüsa akümsü. Iba Act nung section 13 kübok sub-section (8) nung ajemdaker sen apur dang mapang shidak nung item kiojen alangzüktsü metetdaksü.				
Name of Borrower(s)/ Guarantor(s) and Branch		Particulars of property/assets charged		Dt. of Demand Notice and Outstanding Amount
Borrower : Mrs. Shiholi K Awomi Co-Borrower : i)Mr. K Yehokhe Achumi, ii) Miss K Yehokhe Achumi. All the above residing at: H. No. 453, New Colony, Purana Bazar, Dimapur, Nagaland: 797112		All the piece and parcel of land admeasuring measuring 1471.57 Sq. Mtr. (15840 Sq. ft.) situated at Patta No.848, Dag No. 1329/255, located at New Colony, Purana Bazar, Dimapur Revenue Circle, Sub Division & District- Dimapur in the name of Mr. K Yehokhe Achumi		Date of Demand Notice- 16/03/2024 Outstanding Amount- Rs. 35,18,862.67 (Rupees Thirty-Five Lakh Eighteen Thousand Eight Hundred Sixty Two and Sixty Seven Paise Only) plus future interest as per applicable rate and other charges thereon w.e.f. 16/03/2024
Name of Branch: Dimapur		Date : 30-08-2024, Place : Dimapur		Chief Manager & Authorised Officer, Guwahati Zone



TIR YIMYIM YIMOBILEM (EDITORIAL)

DIMAPUR TENTONÜ, SEPTEMBER (RONGJUI) 02, 2024

Lendong nisung

Assam Chief minister, Himanta Biswa Sarma ya par yimten aser tamangba telok asoshibo tajung aser shitak asütsüa akok saka tanga tamangba yimsü amanger teloktem asoshibo kanga lendong nisung lir, anungji pa yabo India ama tamangba yimsü, kin kidong aser sobaliba temeyoktep aika alidak yimsü asütsüla nisungbo masü. Tang amaisa Assam nung pai mamangba Khristan aser Muslim yimsü anemasa inyak nungbo, paia repranga lia Assam ya tongpang raradak tesem ka amai kümadoktsü. Taoba küm Assam nung Yisu tenüng amshia shingaila taneptsüba mapa meinyaktsü aser asentenshi sentong mayongtsü asoshi pai kanga sashia jembia ozüng küma inyakba sülen, tang ano Muslim nunger tekülemba anogo Hokolbar nü tekülemdaki aotsü asoshi Assembly nung akhidang nungi ghonda ana sodi agüja aliba agienba den ano Assam nung alir Muslim nunger anema jembiba ken o tetsürok aser tamajungtem yagi Assam majangzüksü. Iba ama külem alir sensosangertem rongnungsa süaka, pei amangba yimsü dak mamangertem anema o tamajung jembibaji pei kidang peisasa mi asener amai lir. Atangji, alima nung yimten yimsüsürtem shia pei tangatetba aser nükjidong kaka lir aser tanga tebilemba aser nungdak liaka pei nükjidong aser tejangrabaji atongtsü meranga inyaker. Aji oda, kari pei lima terenlok asoshi bilemer, kari pei nübortem tipdema tesünep nung lidaktsüsü bilemer, kari pei kin sobaliba kümzüka yuner, kari pei tamangba yimsü dang amangdaksüner aser ano karibo item ajakji yutsür pei akatsü asoshi rongsen bushiba nung dang temulung agütsür. Asenok yimsüsürtem rongnunga shiba kechi nükjidong nung inyaker asenoki parnok mapa nung metetadoktsü. Ano, item ajak madak yimsüsürtem asoshi tongtibang kaji taruba election nunga pa mesüra laji adoktsüsa inyaksüba jibaji tongtibang akümer. Ibayongji, yimsüsür aikati pei state rangben masü pei yimsüng aser pei constituency ajungtsü indang dang bilemer. Ano, state tulu nung tamangba yimsü aser kin kidong tapu aika meyoktepa alidakbo pei kin aser pei tamangba yimsü atsünga inyakba yimsüsürtema aika angur. Item jagi tamangba yimsü aser kin kidong tapu balala rongnung mangatetep adokdaksür aser iba jagi 'asen kin, par kin', 'asen telok aser par telok' ta telemsa adokdaksür. Iba jagiang asen ajungba agi masü mesüra asen dak alangba agia masü saka 'asen kin, par kin, asen telok, par telok, asen yimer, par yimer, asen tzükong, par tzükong, asen kin, par kin' ta telemsa adokdaksür külen pei teloki tangar yari majung kümdaktsür. Talisa India nung tamangba yimsü aser kin kidong tsütsü nübortem rongnung telemsa adokdaksür külen, idak nung jagi teyari agia yimsü asütsü merangba telok aser nisung aika lir. Ibaji 'tzü mendendakja alidang ango aputsü merang ama,' ta alima shin o nung jembir. Item rongnungji, Assam nung dang masü saka state aika nung BJP telok yabo Hindu nunger tamanger telok amai küma inyakba angur. Atangji, Congres telokia Muslim tsütsü atsünga inyakba mapatem BJP teloki aitsübatem teti angashir. Item ajakji Tsüngrem shitakba dang amangdaksütsü merangba mapa ka masü saka BJP teloki Hindu nunger vote ajak angutsü merangba aser Congress teloki Muslim nunger vote ajak angutsü merangba mapatem dang lir. Item ama mapatem jagi tesem aika nung tai maktetba nisungtem aika lendong ajurudaktsür aser tamangba yimsü ajangabo temeim mapa inyaksüba ser nung tetsükchitepang tendaktsür. Atangji, Himanta Biswa Sarma-i Assam ya küm ishika nung Muslim nungertemi amoksepa adoktsü ta shisabolua metetdaksüba jibaji tim dang lir, kechiyong küm ka nung Hindu nunger kibong ka nung tanur ka asodang, Muslim nunger kibong ka nung tanur asem pezü asor aser ano memeteti aser meteta Bangladesh nungia arua ayanga-ayanga senso küma liadoker, anungji itemji nokdangtsüla. Ajisüaka, aji tamangba yimsü aser par sobaliba anema masü saka temzüng ozüng inyakyim timi lateta azüoktsü aser nokdangtsüsa inyaksü tim. Iba jagi dang pei lima aser nübortem tepela aser tesünep nung lidaktsütettsü.

OLEMSABANG

RONGSEN MASÜ TENÜNG TAJUNGANG SHIMDI

~ L. Kika Pongener.

(Yashi adok nungi...)

Tanü asenok Khristan-tem rongnunga arogo/mungdang nung tenzükbaji tajangzük angulen lenmang tajung ka amai angateta tenzükbaji, mesüra arogo/mungdang mapa nung ketdangsutsü shilem agi atabaji, sen aah-tsü/aayangtsü lenmang tajung ka amai angateta tenzükbaji, tenzüker karbo alitsü akok. Tesungmangtsüka, tanü putu nung arogo aser mungdang teimba ka nung, rongsen ketdangsuba mapa nung, tenzüker karibo nuburtemi tamang makatettsüsa aser temulong melemettsüsa tajitettsü aser tashishitsü keta inyaka alitsü akok...!!! Surabangla, nuburtemi shirnok dak-ang tamang kaatettsü...???

Nisung aikati ochimashi inyaka, tim masüba lenmang nungi bener aruba senji tajangzük tulu amai bilemetsü akok, saka iba rongsenji...ashiko kechi komala lenmang ka nung endoktsü'ar kecha meteta mali. Loktiliba tenzükbaji mapa nung, asen nem nungloktsüba mapa kar nung, ochimashi inyaka sen teraka alozüka/mimzüka bener arutsü akok...Saka kopi meli-i kibong nung ajongbena memetetba tashitak/timtem/lendong kar ataloker Hospital-iang aotsüsa küma-dokra, Hospital nungji sen teraka bener aruba-to ajak zünga yutsütsüa shibai metet...???. Anungji ibala senji kecha tajangzük mali sernung kanga merumeroa bushiteper. Tsüngrem o-i ashir..."Tamajung agi ajangzükba rongsenji kecha tajangzük mali" (A.Shin-10:1). Asenoki sen ta sura ajakji tajung amai bilemer dang ashi...tim masüba lenmang nungi bener aruba senji asen ket nung mayutsü. Iba senji koloni ao-a memeteti senzüka oa-adoktsü. "Ajongben anguba rongsenji ajema akümtsü; Saka züsenba agi terara shibai bendendir aji züintsü" (A.Shin-13:11). Asentsü sena meranga inyaker terara bendenba rongsenjibo tali tali dang züintsü...Saka ochimashi mapa agi aazüka bener aruba senji lakh/crore menden tashi bener aruyongjia, juli tapok/yangkü tapok nung enoktsüba bener arur dang asütsü. Angadi nung anguba rongsenji angadi nung, amajok nung dang endokmatsüsa tensa mapangi bentsür arutsü. "Tiyazü temeli agi anguba rongsenji meyipzua alungba tangola" (A.Shin-21:6). Tangola ya tenuk agibo angur saka tangshitsü makoker...Aji oda, tiyazü temeli agi aazüka bener aruba rongsenji khenbo angur amai asütsü, saka asenoki magishitsü, oda tangola ka amai dang koloni ao'ar memeteti oa-adoktsü.

Nisung aikati tim masüba lenmang nungi bener aruba sen jagi jangradema alitsü ama bilemer, mesüra ochimashi sen agi yangluba ki nungji anisungzüka arishia alitsü amai bilemer tang ashi...Ashiko iba ki nungji arishia alitsü asü (?) malitsü'ar kecha meteta maka. Ashiko, iba ki-ji shir meyong asütsü'ar shibai metet...???. Tim masüba lenmang nungi bener aruba sen jagi, ashiko, asen temang shi nung timtem-ang talila kar bendenloker...Hospital nungang senji endoktsüa shibai metet...!!!???. Aseni bendena yutsüba rongsenji asen chirnur/semchi-semnuri agishitsü asü (?) Magishitsü'ar kecha meteta maka...!!! "Nisung tajungi pei semchisemnur nem senmangtsü toktsür; saka temenenpur rongsenji temeshipur asoshi rizünger" (A.Shin-13:22). Mesüra ashi-auer/rakzükraktemer kari auyar/rakzüker aotsüa shibai metet...!!! Mesüra kitsük-kirong lendong kar agi rongtoktsüa shibai metet...!!! Mesüra, chirnur mozülar (Drug addicted) kari chireptsütsüa shibai metet...!!! Anungji Tsüngrem lartemi anir nubur ajangai rongsen tulu dang nungibo tenüng tajungang shimdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

North Carolina nung Billy Graham Library semdang million 2 jungogo



August 30, 2024 nü Salstein kibong züngsemtemi Billy Graham Library semdangba mapang tangokba noksa nung angur.

September 01, 2024: Charlotte, North Carolina nung aliba Billy Graham Library-i alizüng tasen ka tongtetogo; iba kaketnang semdang million 2 jungogo. Florida nungi arrshi küm 17, Gabriel Salstein-i iba Library semdangba mapang nung million 2 alizüngji atong. Nüngtugu sayutsünger asür Billy Graham'er jabaso aser Billy Graham Evangelistic Association nung Tir, Franklin Graham-i, "Billy Graham Library semdangertemi glass agi yangluba feet 40 talang Kangki anasa aliba kishi ka adena aoer," ta metetdaksü.

"Iba Library yangluba mapang nungbo, nisung million 2-i item kishi adena ia

Khrista osangtajung angashitsü aser North Carolina nungi aluyimer ka jabaso alima tesem balala nung nisung million aika den Kangki osang lemsatepba kulisüa angutsü, ta ni mebilemi liasü," ta pai ashi.

"Küm 70 dak tali kübui sayutsüngiba osangtajungji tanü-a kasa dang," ta pai ashi.

Salstein'er kibongi 2020 küm nunga iba Library ya semdanga liasü. Gabriel-i Billy Graham indang taküm otsü kaket 'Just as I am' azüngba sülen iba Library semdangtsü ajungshia liasü.

Gabriel tetsü Javiera Salstein-i, "Yangi nai inyakba ajanga temaotsü angutsü, ta ni nenok den lemsatepner. Iba

ya ajanga ozü jabaso kanga temoatsü ngua liasü," ta ashi.

Salstein den pa kinüngbu Alex aser par chirnur pongui tanaben iba Library semdang.

"Onoki iba Library semdangtsü yongyaa liasü. Kibuba meimertem den longjemtsü aser Billy Graham-i tenzüka yutsüba mapa maneni inyaktsü atema onok ajungmesoa liasü," ta lai ashi.

Billy Graham Library ya Charlotte indang TripAdvisor nung maneni mezüngbuba jenjang nungsa lir. Iba Library semdangba ajanga nüngtugu sayutsünger Billy Graham indang taküm otsü aser tenzüka wadang tali rajemer.

Iba Library ya 2007 küm lapokba sülen US kübok state 50 aser linük 100 dak tema nungi raliwalirtemi iba Library semdangogo.

ANOGO ABEN TSÜNGREM DEN

Tenüngsang

"...Khrista miim o nung ni angazükba nenoki angatetsü. Iba miim oji tang Tanela nung..nisung chirtem dang memetetdaksü liasü" (Ef. 3:4,5).

Tasen Lai nung tamangertem Tanela Temeshi ajanga Khrista den sendaktepba miim aika jungkai adok. Arogo nung bendanger tamangertem den Yihuda nunger tamangertem den arok senmanger aküm. Iba jungkai adokba tongtibangji Tsüngremi Abraham dang nangzükba temoatsütem dangi meyipa kin ajak moatsü. Abraham, Isak, Yakob pamoki iba tenangzükba nung amang.

Saka Israeli anema apuso aser Tsüngrem nungi pila. Pai pamok alima ajak nung prokshidaksü aser magizük, anungji bendangertem dangi ao. Bendanger kintemji Yihuda nunger asoshi tesembatsü liasü, anungji parnok nem agütsüba taochi aser yimlibilem atemaji Abraham nungi jakzükertemi mebilem. Aji saka tamangertem ajak nem Abraham temoatsütem agütsütsü Tsüngrem sentong liasü. Miim mapaji ya, Tanela Temeshi ajanga Paul dangi jungkai madoktsü tashi Tsüngremi iba tenangzükba miima dang ayu. Yihuda nungeri mebilemba bendangertemi agizük. Tsüngrem sentongji kin ajak, oshi ajak temang ka nung temoatsü lemsateptsü asoshi liasü.

Oba, Bendanger temenen nisung ka, Abraham dang nangzükba temoatsü nung shilem agir kümdaksüba asoshi ne tenüng asanger.

Küm pezü tsüngda Nigeria nung Khristan 16,000 dak tema tepset

September 01, 2024: 2019 küm nungi tenzüka 2023 küm tashi nung Nigeria nung Khristan 16,000 dak tema tepsetogo, ta Observatory for Religious Freedom in Africa (ORFA) teloki metetdaksü.

Brihostibarnü (August 29) ORFA teloki küm pezü indang data project ji sangdonga liasü.

2019 küm nungi 2023 küm tashi nung Nigeria tesem balala nung civilian aser sepaitem 9,970 ben amakba nung nisung 55,910 asü. Asürtem rongnung Khristan 16,769 aser Muslim nunger 6,235 liasü. Khristantem tepsetba shilem 55 bo Fulani telok ajanga liasü.

ORFA nungisa Frans Vierhout-i, "Nisung million aika tekümsükba mali. Küm aika parnoki teyari meshia ayimdenba ola asenoki angashir, kechiyong kiralongrartemi parnok amaker," ta ashi.

Nigeria tesem balala nung nisung 21,621 dak tema puer ogo aser iba nungjagi nisung 11,610 bo tepsetogo, ta ORFA-i metetdaksü.

Telok balalai puer aoba nisung 21,532 nungjagi nisung 11,185 Khristantem liasü aser Muslim nunger 7,899 liasü, ta ORFA-i metetdaksü.

Küm pezü tsüngda Nigeria nung nisung puer aobaji anogo shia nisung 8 puer aoba den kasa liasü. Aonung kiralongrartemi amakba nungi jenbutsü atema tanurtemi süngdong nung ang mejanga osangtem lir, ta kasa report ajanga metetdaksü.

Kiralongrartem aser auer telok balalai timtem agütsüba Local Government Area 56 liasü. Talisa April nungi June ita tsüngda aluyimertem alu wadang tulu inyakba mapang nung kiralongrartemi amaker, ta ORFA-i metetdaksü.

Al-Qaeda-i küm 7 pua ayuba missionary kati taküm kuli lemsatep



Dr. Ken Elliott aser pa kinüngtsü Jocelyn na noksa nung angur.

September 01, 2024: Al Qaeda den tesendaktep aliba kiralongrar telok kati küm tenet tashi pua ayuba Khristan missionary kati taküm kuli lemsatep.

Kiralongrartemi missionary, Dr Ken Elliott puer aoba mapang nung pa küm 82 liasü.

Küm aika parnoki Burkina Faso nung medical missions nung tenzüka liasü. Parnoki shirangertem shinga bendangshidanga mezüngshii ajak kasa dang anepalua liasü.

Ibaji ajanga Muslim nunger aikati Khristan

ali," ta metetdaksü.

Tangar ket nung mapang talangka alidang chiyungtsü tajung machiba agi Ken health kanga mejungi aküm. Pa tetsüng awakba ajanga pai mejajateti aküm.

Ken apurtemi pa Islam yimsü dangi meyipdaksütsü kanga merang saka pai pa tamang jenjang manokshi aser lisem lima nung tsükchirtem ket nung mapang talangka liaka pai Tsüngrem dak teimla mesamai liasü.

Ken-i, "Kibubai kü dang kanga jungogo. Ni Islam yimsü dangi meyipba ajanga Tsüngrem mejashidaksü ni melungteta liasü," ta ashi.

Ni küm tenet tashi timtema liaka mapang ajak nung Tsüngrem kü den liasü, ta pai ashi.

Tesüsa yaküm May ita nung pa chioka liasü.

"Nisung noklang ishikati dang masü saka meyirjang aikati sarasademtsüba ajanga onok chiok ta onoki amanger. Onoki sarasadem nung amanger," ta paisa shisem.

AO OSHI ANGAZÜKDAK:
TANÜ ANGAZÜKTSÜBA OJANG



Tamayazü

(adj) ochishiba, tiyazü mali (truth)

* Tamayazü mapa agi lokti telongjem tashi itdaksür.

Tamayazür

(n) tsüngchir, ochishir (faithful person)

* Tamayazür nisungi lokti rongsen junga amshir.

OLONG PAITEP # 6912

	1		2			3		4		5
6								7		
						8		9		
			10							
11										
				12						
13		14		15						16
17										18

TIPLÉN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesü inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _____ - (4)
- 13. Yagi ajak ashiochtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ____ hi - (3)
- 16. Akümüli nungi pilar - (3)

OLONG PAITEP # 6911 TELANGZÜBA

TIPLÉN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük,
- 11. teronem, 12. Sempa,
- 13. Jahaz.

KHEN SHISADANGDI

ALOKBAI NBCC DANGI SUNDAY
ATEMA INYAKTSÜ SHIDANGER

Akümstüba aliba NBCC lenirtem, Nagaland for Christ tenü nung Deobar anogobo Dokan ajak shibangtsü ozüng agütsü nungbo, Deobar anogo ya Koda temenungratsüka Süla nah? Yamaji inyadaksünür. Khristan lima asünung, Khristai melaba ama inyaksüla ozüng amer temi inyaksü ta matatsüla. Tashi mangarji Tsüngremi inyaksü ta Tsüngrem nema menonglochtsüla. Aseni akokbabo inyakdi. Tsüngrem tsüngdang kechi langzüksü. Arogo shia dangi osang agütsür, Deobar anogo yabo amongnü ama meshiteta mongner. Shiti ya nguli sarasadema mapa küma inyaksü merangangma.

NBCC-isa matayonga Pastor fellowship senteper tongtipangsa Dimapur ama dokan totally bandh asütsü ayimoktsü nung junger. Dokan tila tulu kecha mali dokan tulu (Mahal) amala ajak shibangtsüla. Deobar dokan lapoka aliba ngua pastortem temolung maronger noh? Ni Alokbai bo temolung rongsar.

*Oh Tsüngrem ni Alokbai bilembaji imlibilema
atalokdakjangma.*

~ Aienla Ao

Meghalaya nung school
transport latettsür

Shillong, September 1, 2024
(Agencies): Meghalaya nung Education Department-i kaketshirtem lendong nungi jenbua lidaktsütsü atema school ajak dang kaketshir anishiba garitem nung telatet ayutsü tetuyuba agütsüogo.

Supreme Court Committee on Road Safety-i guidelines agütsüba ama Meghalaya Education Department-i iba ya tuyuogo.

School bus aser three-wheeler ajak nung kaketshirtem amentsüba capacity sayutsüla. School ketdangsurtemi mapang shia kaketshirtem anir senzüba gari ajak indang 'capacity limits' reprangtsüla ta parnoki ashi.



OFFICE OF THE
LONGSA KAKETSHIR TELONGJEM

H.Q. Longsa Village,
Dist. MOKOKCHUNG - 798601, NAGALAND

TENÜNGSANG AGÜTSÜR

Sp. Temshimeren tebu Wb. Taliwapang Lkr tetsü Wt. Dr. Atemla tena jabaso -i NPSC tatidang agiba Personal and Administrative Reforms Dept. küpok EAC (CI-1 Gazetted Junior Grade) jenjang tongtetba atema LKT ajak tenü nung konang tetushi agütsür.

Anungji, tarutsü Naga nunger nübor asoshi ne shisa tajungi maneni nendaka tajungtiba nung nübor tenzüksü asoshi ne wadang nung Tsüngremi len aniang ta sarasadema atar.

Sd/-
Sp. Temjenmeren
Tir.

Sd/-
Kr. Bendangsenla
Tongti Zülur

Arunachal nung hydropower project anema lungkak aiter



Itanagar, September 1, 2024

(Agencies): Arunachal Pradesh nung Siang district nung alirtemi Honibarnü 12,500 MW Siang Upper Multipurpose Project yangluba anema lungkak aitogo.

Iba mapatong ya National Hydroelectric Power Corporation (NHPC)-i inyaker aser Dite Dime, Parong o Uggeng yimtsü nung alirtemi iba mapatong ajanga parnok nem timtem bentsür arutsü ta tsübur.

Iba mapatong ajanga parnok aluyimba aser libaliro nung timtem ajurutsü ta parnoki tebilemtsü abener.

All Adi Welfare Society,

Siang Indigenous Farmers' Forum aser Banggo Students' Union ajanga ayongzükba sentong nung nisung 600 temai shilem agiogo.

Parnoki sorkar aser NHPC anema yimyim ayim aser "forceful survey-cum-pre-feasibility report" magizükba metetdaksü.

NHPC-i tashiyim agi PFR mapa tenzük ta Parong village committee-i Siang superintendent of police tsüngdang ken o ka benokogo.

Iba survey ya yimdaklirtem dang nungi temelaba magii inyak ta parnoki ashi.

Taküm June ita Siang aser

Upper Siang district tem nung deputy commissioner tem den senden amendang gram sabha züngsemtem, village chiefs aser general public-i PFR magizükba metetdaksüogo ta committee-isa ashi.

Parnoki NHPC aser mapa inyakba agencies anema FIR ka benoktsü police dang shiogo.

Iba temeket nung alirtemi magizükba ajanga NHPC-i takü July ita security meshia liasü.

Hokolbarnü Siang deputy commissioner-i nübor tem dang Honibarnü sentong nung madentsü tetuyuba ka agütsü. Iba sentong ya sorkar anema aser terenlok anema lir ta pai ashi.

Ripun Bora-i Assam TMC president nungi anen

Guwahati, September 1, 2024 (Agencies): Assam nung Trinamool Congress (TMC) State President Ripun Bora-i National Secretary, Abhishek Banerjee dang pai mapa nungi anenba shidi agütsüogo.

Bora ya taoba Member of Parliament (Rajya Sabha) lir aser TMC ya West Bengal indang regional party ka ama züngshiba ajanga mapa nungi anener ta pai züluba shidi nung shia lir.

Assam nung BJP melena

TMC asütsü atema anibelega inyaka aruaka Abhishek Banerjee aser TMC tanishir Mamata Banerjee na den ajuruteptsü mapang manguba atema mepelar ta Bora-isa ashi.

West Bengal indang regional party tangatetba ya melendaktsütsü atema tebilemba aika lemsatepogo aser national level nung Assamese nunger lennir ka alitsü, aser Assamese sobaliba senmang tesemtem ajungkettsü shiogo ta Bora-i ashi.

Bora-i April 2022 nung TMC nung aden aser pai iba menden toktsüba ya nija tebilemtsütem ajanga masü saka pai mazioktetba tensa ajuruba agi lemtetba lir ta ashi.

Pai maneni lokti nung telemsa adokdaksür aser tashiyim agi sorkar ketdangtsüba anema raratsü ta Bora-isa metetdaksü.

Bora den külemi TMC Assam nung youth wing president Mehboob Ali-ia nija onük kar nung ajemdaker mapa nungi anenogo.

Mizoram CM-i US nung Mizo Day nung shilem agitsü

Aizawl, September 1, 2024 (Agencies): Mizoram Chief Minister Lalduhoma-i hopta ka atema United States semdangi ogo aser US nung aliba Mizo nungeri ayongba sentong ka nung adentsü ta CMO osang ajanga metetdaksü.

Lalduhoma den pa kinungtsü Liansailovi, semchir Zodinthari aser Officer on Special Duty to

the CM, Lalremruata nunger ao ta osang angazüker.

US nung amongdang Lalduhoma-i Maryland nung 'Mizo Day' benjungmong nung adentsü aser US State Department ketdangsurtem den-a ajuruteptsü. Paisa Indianapolis nunga sentong ka nung adentsü.

Mizoram CM Lalduhoma

indang tour programme ya Ministry of External Affairs ajanga agizükogo aser pai US oa atongdang Consul General of India-i pa pelashishia agizüktsü ta osang ajanga ashi.

MEA-isa Lalduhoma atema 'security protection' renemtsüogo aser pa adenba sentongtem nung Indian ketdangsurtem pa meintsü.

Trump-i temeshi tesem mezüngmeshi: Kamala Harris

Washington, Rongjui/ September 01 (Agencies): Taoba tir Donald Trump-i tang tesüsa Arlington National Cemetery semdangba noksa tangoka prokshiba ya temeshi tesem akumtsübo maliba map aka lir, ta US Vice President Kamala Harris-i ashi. Iba tesem nung nübuyimba sentong magitsü tenokdangba lir.

Harris-i social media sapang X nung Honibarnü sangdong ka agütsüba nung, iba tesem nung ozüng aliba indang tekumtangtsü shiaka Trump indang campaign ketdangsür temi iba leper staff ka den asatep aser taoba tir indang noksa aser video agia liasü.

“Political stunt mechi taoba tiri temeshi tesem mezüngmeshi,” ta Harris-i ashi aser Arlington ya temeshi tesem ka lir, kong asenok ajak lungjemer American heroes tem akumtsübor aser ibai politics asayatsü tesem masü, ta shisem.

US-i kanga arsanga Afghanistan nungi sepaitem ainshiba atema Trump aser Republican temi Tir Joe Biden aser tang Harris maneni aitsüba nungi tenzüka iba ya

atalok. Afghanistan nungi sepaitem ainshiba mapang züngsem kar tepsetba kinunger temi jaokba ama Trump-i Hombarnü Sgt. Nicole Gee, Staff Sgt. Darin Hoover aser Staff Sgt. Ryan Knauss nunger nem akum agüja naro yutsü.

August 26, 2021 nü Hamid Karzai International Airport nung bomb pokloksüdang US service züngsem 13 aser Afghan nunger 100 dak tema asürtem rongnung par asem ya dena liasü.

Leper nung meraratepdang Trump indang campaign dang noksa magitsü shia liasü, ta defense ketdangsür temi ashir. Trump campaign staff anati merenshia nungdokba Arlington employee yagi ken o benoktsü memulung, ta ketdangsür temi ashir.

Iba sülen Trump campaign yagi Pentagon ketdangsürtem aitsür aser top campaign adviser Chris LaCivita-i mitkar indang odongtatem ya “hacks” tem lir ta ashi. Trump campaign ketdangsür temi video agitsü asoshi nisung anir arutsü temelaba agir liasü ta

ashir. Biden-i US tir asoshi tanaben tokteptsü merangba anenba sülen Trump-i Harris aser la indang foreign policy telemtetbatem aitsür.

2020 küm Trump administration-i Taliban den jembiba ama mapang shidak nung ainshitsü atema Biden indang administration-i inyaka liasü.

Sorkari shimtetba special investigator temi 2022 küm bushisüngdangba nung, Afghanistan indang mitkar kanga kera laoba aser Taliban-i agiba nung Trump aser Biden nati telemtetba agibatem dena lir ta ngutet.

Trump-i sepai tejentem den raratepba aser asür sepaitem dang “suckers” aser “losers” ta ajaba aser Medal of Honor agizüker mezüngmeshiba otsü lir, ta Harris-i Honibarnü ashi.

“Iba nisung yagi pa atema inyakba dak alaka kecha magizükteter. America nunger “fallen heroes” temi tenzüka aser bendanga agütsüba ni teti akumtsübotsü... Aser ni kodanga parnok “politicize” masütsü,” ta Harris-i ashi.

Yasüng Ukraine indang drones 158 khazüka yok: Russia

Moscow, Rongjui/ September 01 (Agencies): Deobarnü Russia-i ashiba agi, Ukraine-i drone amshia kanga sashia amaktsü merangba nungi kumzüka linük yimtiba Moscow nung ana densema region 15 nung drones 158 khazüka yok.

Moscow yimti anasa coal-fired power plant ka aser oil refinery ka nung kongshi ta ashir.

Drones timba – 122 – Kursk, Bryansk, Voronezh aser Belgorod region tem nung khazüka yok, koba Ukraine den arütsüa lir, ta Russia indang defence ministry ajanga ashi.

“Bryansk region nung UAV amshia kanga sashia amaktsü merangba asen sepaitemi nokdang,” ta regional governor Aleksandr Bogomaz-i ashi.

Russia indang drones aser missiles 200 dak tema amshia Ukraine indang energy infrastructure maker anogo ishika lir iba osang ya angashir.

Ukraine anüdoklen Russian sepaitem meilongi süaka maneni takok nguyonga oaka Ukraine-i Russia indang Kursk region nung kanga sashia rara takok nguyonga ao tenzüker ita ka

jungnüa lir iba ya ataloker. Russia-i 2022 küm February ita nungi Ukraine nung tesem balala amak tenzüker linük anaprongi energy infrastructure nung tenük yoka arur.

Moscow region nung ketdangsür kati ashiba agi, drones asema Kashira coal-fired power station nung kongshitsü merang.

“Asü-amaba mesüra ki o jen raksaba mali aser electricity tang tashi shidak agütsür,” ta pai ashi.

Russian news agency temia Kapotnya nung aliba Moscow oil refinery nung mi adok ta ashi saka mayor Sergei Sobyenin-ibo yangji teraksaba mesüra asü-amaba mali ta ashi.

Belgorod region indang governor Vyacheslav Gladkov-i ashiba agi, Belgorod nung nisung aliba ki asem indang glass raksatsü. Nija ki ka aser nüburtemi amshiba ki ka aoyi kuma raksatsü.

Bodhbarnü Ukraine indang drones temi Russia indang Rostov region aser northern Kirov region nung totzü bendena ayuba tesem ana nung kongshia mi adoka liasü.

Gaza nung pua aliba Israel nunger trok tasü mang ngutetogo

Tel Aviv, Rongjui/ September 01 (Agencies): Israel military-i sangdong ka ajanga ashiba agi, dual US national ka densema Hamas puri pur or alir parnok trok tasü mang southern Gaza nung tunnel ka nung ngutetogo.

October 7 nü nungi Israel-i Gaza amak tenzüka sülen Palestine nunger 40,000 dak tema tepsetogo. October 7 nü Hamas puri Israel amakba sülen nisung 250 shi pur oa liasü. Tepuokertem chiochtsü atema ceasefire ka benoktsü asoshi Israel-i memulungi iba tesem kanga mejungi maka arudar.

Military-i Deobarnü ashiba agi, tasü mangtem ya Rafah nung tunnel ka nungi ngutetogo aser Israel-i bener aruba sülen parnok maitsü jangjaogo. Military-isa, tepuokertem ya tepseter mapang tatsüka tsüngda parnoki nguteta liasü, ta shisem.

Asürtem ya Almog Sarusi, Alex Lobanov, Carmel Gat, Ori Danino, Eden Yerushalmi aser Hersh Goldberg-Polin ta jangjaogo.

Hamas-i pur or alir kinungertemi tentetba lokti tenteti Deobarnü longkak aitsü ayongzükogo. Tanungba tepuokertem chiokdaksütsü atema ceasefire benoktsü asoshi takhangba agüja liasü. Iba ken o achayangba dak sendakba nung parnoki Ato Kilonser Benjamin Netanyahu aija arudar.



“Pur or alirtem anir arutsü atema ita ana dak tema jembishinüa arudar. Inyakyim menomeyang mesüi benoka inyak asübo tanep shirnok asüba idang osang angazükogo parnok ya taküm lila. Pur or alirtem kidangi meyipa anir arutsü mapang tongogo,” ta Hostages and Missing Families Forum-i ashi.

Hamas lenir tejen Izzat al-Risheq-i ashiba agi, Israel-i anüng ajanga iba tesem amakba mapang pur or alir trok tepseta liasü. Al-Risheq-isa, ita 11 tashi rara aruba mapang US-i Israel tali pusemba atema aitsüogo.

Kasa mapang nung Israel

Ato Kilonseri Deobarnü, mang ayangtsü nangzükogo aser ashiba agi, “onoki nenok bushia tepsettsü.”

“Shirnoki tepuokertem tepsetogo, parnoki Gaza nung tenangzüktepba ka maginer, ta Netanyahu-i ashi.

Israel kübok Bar-Ilan University nung political science professor Menachem Klein-i, pur or alirtem chiokdaksütsü atema tenangzüktepba yanglutsü memulungba atema Netanyahu aser pai aniba cabinet aitsüogo.

Maneni US tir Joe Biden-ia, Israeli-American Goldberg-Polin densema pur or alir nisung trok tashi asüba

osang angashia pa temulung kanga koremer aser mit adoker, ta ashi.

Biden indang administration-i Israel nem senotsü aser military teyari balala agüja arudar aser parnoki Hamas lenirtem parnok inyakyim atema merenshitsu, aser pur or alir tanungertem chiokdaksütsü atema onoki maneni inyaktsü, ta ashi.

Biden-i May ita pur or alirtem chiokdaksütsü atema ceasefire asoshi tenangzüktepba ka yanglutsü atema benokba Netanyahu-i magizük.

Anogo ishika tejkadng Kaid Farhan al-Kadi, shiba

southern Israel nung Bedouin lokti nungi lir pa km ka shi pilar kumzüka liasü,” ta military-i ashi.

Israeli publication YNet-i sangdong ka ajanga ashiba agi, tang tepsetertem rongnung parnok asembo July 2 nü Hamas puri tepuokertem chiochtsü atema agizüker aliba list nng densema liasü.

Asürtem rongnung Carmel Gat densema lir. Pa adianu Gil Dickmann-i, tanungba tepuokertem chiokdaksütsü atema Hamas pur den sendaksemtsü asoshi Netanyahu-i aniba sokar nongshitsü atema anogoshia longkak aita arudar.

Dickmann indang adianu Kinneret Gat-a October 7 nü southern Israel kübok Be’eri kibbutz nung tepseta liasü.

“Benjamin Netanyahu-i mangar. Benjamin Netanyahu sensaksemba takdang nung politics tokjang,” ta Dickmann-i ashi.

Hamas pur den tenangzüktepba ka yanglua nisung 105 chiokba sülen ano nisung 100 shi sota yua lir.

Ajisüaka rara nung aibelenba atema Israel aija arudar. International Criminal Court persecutor-i, Netanyahu aser pa indang Defence Minister Yoav Gallant na atema arrest warrants meshiogo. Kasa mapang nung Hamas nunger lenir ana atema-a warrant meshiogo.

DC Mkg-i MATA contingent minoktsü



DC & Chairman MDSC Thusvisie Phoji-i Mokokchung District Taekwondo Association contingent minoktsüba noksa nung angur.

Mokokchung, Rongjui/September 1 (TYO): August 31 nü Deputy Commissioner & Mokokchung district Sports Council mendenbuba Thusvivie Phoji-i, 34buba Nagaland State Taekwondo Championship nung shilem agitsü aliba Mokokchung District Taekwondo Association tenüng

nungi asayrtem NST Station nung minoktsüogo.

Iba asayamung ya September 2 aser 3 nü Phek district nung asayatsü.

MDTAcontingent nung asayar 33 densema lir aser parnok category ajak nung tokteptsü. Asayartem meina coach pezü aser manager tem ogo.

Sentong tatsüka agiba mapang DC-i asayartem dang yimya yimpong aziüoka takokba tashi tajungtiba asayatsü ajungshia liasü.

Kasa mapang nung MTBA associate pastor Monglier-i laishiba ka zünger asayartem atema tsüngrem temoatsü meshizüka sarasademja liasü.

Dr. T.Ao Trophy ayongzüka asayatsü Tuensang renemdar



Dimapur, Rongjui/September 1 (Agencies): 23buba Dr. T. Ao Football Trophy Tuensang jila nung ayongzüka asayatsü renemdar. Iba asayamung ya September

17 nü nungi tenzüka Loyem Memorial Astro Turf Ground nung asayatsü.

Iba inter-district asayamung ya Nagaland Football Association-i ayongzüka aser

Tuensang District Football Association (TDFA)-i achaayanga asayatsü. Asayamung ya September 27 nü tashi asayatsü renema lir.

Taküm iba asayamung lapokba sentong nung Chief Minister Neiphu Rio tongti tejaoker asütsü.

Iba state level asayamung atema Loyem Memorial Astro Turf Ground nung renemshi tenzükogo, aser takokma nung asayatsü imla atadar.

Osang ajanga ashiba agi, taküm iba asayamung nung Nagaland kübok district 16 pronglai shilem agitsü renemdar.

Taoba mapang Ivory Coast defender Bamba süogo

Rongjui/September 1, 2024 (Agencies): Taoba mapang Ivory Coast international defender Sol Bamba, shiba cancer agi shiranga aliba aneper tanaben asayashia liasü pa arishi küm 39buba nung süogo, ta taoba mapang pa asaya aliba club-i sangdong ka ajanga metetdaksü.

“Taoba mapang club captain Sol Bamba arishi küm 39buba nung asüba osang angazüka Leeds United kanga temulung koremer,” ta club sangdong ka ajanga metetdaksü.

Bamba, Hokolbarnü shiranga anir mao tsüngda pa Turkish club Adanaspor nung coaching staff den inyaka liasü.

“Onok indang technical director Souleymane Bamba, shiba yashi Manisa Football Club den masaya tsüngda shiranga liasü, pa Manisa Celal Bayar University Hospital-i anir

ao saka tia maka pa süatok,” ta Adanaspor-i social media nung sangdong ka ajanga metetdaksü.

“Onoki par kinunger aser ozü lokti den asükhu lemsateper,” ta kasa sangdong ajanga metetdaksü.

Bamba Cardiff City nungi asaya aliba mapang 2021 küm pa dak Non-Hodgkin lymphoma putet, ajisüaka chemotherapy course ka agiba sülen pa anepogo ta sangdong aser iba sülen pa maneni Cardiff aser Middlesbrough nungi asaya liasü.

France nung asosang Bamba mezüng Paris St Germain nung asaya tenzüka aser iba sülen Scotland-i ao.

Pai teyari agüja Dunfermline pur Scottish Cup final tonga asaya aser iba sülen Hibs-i aser 2011 küm Leicester nung dena liasü.

Turkey aser Italy nung

mapang tatsüka asayaba sülen pa Leeds nung aden, kong pa club captain liasü. Cardiff nungi mezüngbuba asayaba küm parnok Premier League-i promote süa liasü.

Pa Cardiff nungi 100 ben dak tema asayaogo. “Tejashitsüka yashi nikongtsütsü club legend, Sol Bamba asüba osang angazükogo. Asayar aser coach ka ama Sol-i club atema kechi inyaktsüogo, aji medemdangtsü makok. Pa onok ajak atema hero aser lenir ka ka liasü. Mangyim jashi mapang onoki par kinunger aser medemertem den asükhu lemsateper,” ta club sangdong ka ajanga metetdaksü.

Bamba 2008 küm Olympics nung Ivory Coast tenüng nungi asayaogo aser 2012 Africa Cup of Nations nunga asayaogo. Pa linük tenüng nungi 46 ben asayaogo.

US Open: Sinner aser Swiatek na round of 16 tongogo

Rongjui/September 1, 2024 (Agencies): Tang asaya aliba US Open tebur kija asaya nung world number 1 asayar Jannik Sinner-i Christopher O’Connell koka round of 16 tongtetogo, aser kasa mapang nung tetsürtem rongnungi world number 1 asayar Iga Swiatek-ia takok nguogo.

Australian Open champion Sinner-i, 6-1, 6-4, 6-2 agi Christopher O’Connell madak takok ngua liasü.

Alexei Popyrin-i iba asayamung pezüben tashi koker alisang Djokovic tsükdaktsüba sülen anogo ka lir arishi küm 23 tain Italy nunger asayar yagi iba asaya koka liasü.

Iba masüding Breststibarnü 2022 küm iba asayamung koker alisang Alcaraz-a tanabuba round nung Botic van de Zandschulp-i tsükdakja liasü.

Asaya nung Sinner-i aces 15 ao aser winner 64 ngua O’Connell amokbanger asaya liasü. Tena ghonda ka ser minute 53 asayaba mapang O’Connell-i Sinner indang serve break asütsü atema khen danga maongka mongutet.

Sinner taruba asaya seed 14buba nung alisang Tommy Paul den asayatsü shibai Canada nunger qualifier Gabriel Diallo set pezü asayaba sülen

koka liasü.

Kasa mapang nung tetsür kija asaya nung French Open pezüben tashi koker aliba Swiatek-i asaya amokbanger asaya aser lai Russia tsür Anastasia Pavlyuchenkova 6-4, 6-2 agi ayong ayonga koka liasü.

Arishi küm 23 tain asayar ya asaya tepeyong nung khen danga la indang serve break asütsüsa jenjang kati mai. La taruba asaya ano Russia tsürsa Liudmila Samsonova den asayatsü.

Maneni tebur kija asaya nung Britain nunger asayar Jack Draper taküm agi küm anabuba atonga iba asayamung round of 16 tongtetogo. Pai Alcaraz tsükdaktsüsang Botic van de Zandschulp 6-3, 6-4, 6-2 agi koka liasü.

Tetsür kija asaya nung 2023 semi-finalist Karolina Muchova, shibai tanabuba round nung Naomi Osaka tsükdakja liasü, lai Anastasia Potapova 6-4, 6-2 agi koka round of 16 tongtetogo. La taruba round nung Jasmine Paolini den asayatsü shibai Yulia Putintseva 6-3, 6-4 agi kokogo.

Ano tetsürtem rongnung US tsür Jessica Pegula-i 6-3, 6-3 agi Jessica Bouzas Maneiro koka round of 16 tongtetogo. Pegula taruba asaya Diana Shnaider den asayatsü shibai Sara Errani straight sets nung kokogo.

Joe Root-i otsü tasen ka yangluogo

Rongjui/September 1, 2024 (Agencies): Sri Lanka den tanabuba test asaya nung Joe Root-i otsü tasen ka yangluogo. England pur innings nung Root-i pa indang career nung Test century 34buba yanglua liasü. Pai Alastair Cook ajateta England nunger asayartem rongnungi Test asaya nung century timtiba yangluba asayar kümogo.

Cook-i iba record ya küm trok tashi bener liasü. Taoba mapang England captain yagi 2006 küm mezüngbuba India den asayaba mapang century ka yanglu aser küm 12 lir India den asayaba mapangsa century ka yangluba sülen asaya nungi anena liasü.

Root, shiba Cook lenisüba nung mezüngbuba 2012 küm India den asaya liasü, pai Sri Lanka den tanabuba Test masaya tsüngda century 32 yanglur liasü. Iba asaya mezüngbuba innings nung pai run 143 yanglu aser tanabuba innings nunga century ka yanglua liasü.

Test asaya nung century timtiba yangluba England nunger asayartem rongnungi Root sülen cook (33) lir. Tena sülen tasembuba nung Kevin Pietersen (23), pezübuba nung

Geoffrey Boycott (22), Ian Bell (22), Wally Hammond (22) aser Colin Cowdrey (22) nunger lir.

Maneni Root ya Lord’s nung Test asayaba mapang century timtiba yangluba asayar kümogo. Pai iba tesem nung century tenet tashi yanglur lir. Pa sülen Graham Gooch (6) aser Michael Vaughan (6) na lir. Ano Root ya Lords nung test asayaba mapang innings anaprongla nung century yangluba England nunger batsman tem rongnung pezübuba kümogo.

Tanabuba innings nung Root-i century yangluba sülen England team-i run 251 yangluogo aser asaya akoktsü atema Sri Lanka team-i run 483 yanglutsü nungdaker.

Iba asayamung nung mezüngbuba test asaya England-i wicket 5 agi koka parnok 1-0 agi tejakdang lir aser Lord’s nung asaya ya-a parnoki akoktsü imlar. Team ana tsüngda Test asem asayatsü.

Root dak alia ano Gus Atkinson-i kanga junga asayaogo. Pa ya Lord’s Cricket Ground nung century ka yangluba den wicket pongu agiba mezüngbuba asayar kümogo.

BILEMDANGANG

“Ajaki agizüktetba aser ochi na bendangang.”